

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-34-Z/23
Kakanj, 30.11.2023. godine

Z A P I S N I K
sa 34. redovne sjednice Općinskog vijeća održane 30.11.2023. godine (četvrtak)
u sali Općinskog vijeća sa početkom u 9:00 sati
(sažetak zapisnika)

Predsjedavajući Općinskog vijeća Slaven Katičić je pozdravio prisutne i otvorio 34. redovnu sjednicu Općinskog vijeća.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Mediha Mamela, Džemal Bećirhodžić, Safet Šahman, Nerma Aliefendić, Namir Talić, Adis Mrkonjić, Elvir Delibašić, Amar Selimović, Kenan Kozlo i Izudin Hrusto (**SDA**)

Vinka Aletović, Miroslav Spasojević i Edin Šljivo (**SDP BiH**)

Zerina Kovač, Mirsad Tursum, Fakir Ajdinović i Sabit Čehajić (**S BiH**)

Dževdet Huskić, Marcela Ravlija i Branko Češljčić (**NS**)

Mugdin Gorak i Enver Merdić (naknadno pristupio) (**SBB BiH**)

Armin Bašić (**DF**)

Slaven Katičić (**HDZ BiH**)

Mujo Fafulić (**nacionalna manjina**)

Odsutni vijećnici: Mejrema Purišević i Izudin Puščul (podnio ostavku) (**SDA**), Ahmed Begić (**SDP BiH**) i Adnan Čobo (**DF**)

Predsjedavajući je konstatovao da je na sjednici u momentu prijave prisutno 25 vijećnika i vijećnica, te su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Mirnes Bajtarević, općinski načelnik

Emir Zaimović, sekretar Općinskog vijeća – po ovlaštenju

Džihad Berbić, pomoćnik općinskog načelnika za finansije

Mirza Fazlić, pomoćnik općinskog načelnika za privredu, urbanizam i zaštitu okoline

Bahrudin Arnaut, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

Edin Aliefendić, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Nurudin Hrusto, pomoćnik općinskog načelnika za civilnu zaštitu

Mukades Delibašić, pomoćnik općinskog načelnika za imovinskoppravne, geodetske poslove i katastar nekretnina

Zijad Neimarlija, direktor Zavoda za planiranje i izgradnju općine Kakanj

Mahir Sikira, šef Stručne službe za poslove Općinskog načelnika

Izjave, obrađivači, gosti

Mirsada Čaluk i Azra Čišija, predsjednica UO i direktorica JU „Mladost“ Kakanj
Sedin Karahodžić, predsjednik Komisije za utvrđivanje kriterija, postupka, načina davanja i izmjene naziva ulica, trgova...

Predstavnici medija

NTV IC Kakanj

Radio Kakanj

Napomene o radu Kolegija Općinskog vijeća

U pripremi 34. redovne sjednice Općinskoga vijeća, Kolegij Općinskog vijeća je 22.11.2023. godine, održao sjednicu na kojoj je razmatrao:

- Izjašnjenje općinskog načelnika na zahtjev TD „Nova trgovina“ d.o.o. Kakanj za produženje roka za izgradnju i primopredaju tržnice i zaključenje aneksa Ugovora o kupoprodaji nekretnine

Kolegij je Izjašnjenje općinskog načelnika primio k znanju, te je isto zajedno sa Izjašnjenjem Općinskog pravobranilaštva po predmetnom Zahtjevu prosljedio podnosiocu Zahtjeva.

Usvajanje zapisnika sa 33. redovne sjednice Općinskog vijeća

Nije bilo diskusije o zapisniku i isti je usvojen jednoglasno sa 25 glasova ZA.

Komentari na dostavljene odgovore na vijećnička pitanja

Nije bilo komentara na odgovore na vijećnička pitanja.

Komentari na dostavljena mišljenja na vijećničke inicijative

Dževdet Huskić: je u vezi podnesene inicijative za temeljito pranje ulica prije početka zimske sezone rekao da u odgovoru Zavoda stoji da se pranje ulica vrši prema unaprijed utvrđenom planu, a da je temeljito pranje planirano po završetku zimske sezone, radi uklanjanja materijala posipanog tokom zime. Rekao je da mu jasno da je to planirano, ali isto tako smatra da je neophodno takvo pranje izvršiti i prije zimske sezone iz razloga veoma velikog nivoa masnoće koji se nalazi na ulicama, te je predložio da se ubuduće planira temeljito pranje ulica dva puta godišnje, prije i poslije zimske sezone.

Vijećnička pitanja

Marcela Ravlija: je postavila vijećničko pitanje kako JP „Grijanje“ korisnicima usluga obračunava dane kada nema grijanja? Navodi da je aktima JP „Grijanje“ propisano „ako prekid distribucije toplotne energije potrošaču traje duže od 20 sati neprekidno, distributer će kod paušalnog obračuna troškova, potrošaču umanjiti račun proporcionalno trajanju prekida isporuke toplotne energije“. S toga je nejasno na koji način JP „Grijanje“ umanjuje paušal, jer računi koje su nezadovoljni korisnici usluga dobili ne odražavaju stvarnu potrošnju tj. isporučenu toplotnu energiju, što se vidi na primjeru Čatića (ogranak prema Željezničkoj ulici), gdje u mjesecu oktobru više od 15 dana nije bilo grijanja, pri čemu je paušal umanjen za manje od 30%, a trebao je biti umanjen najmanje 50%.

Dževdet Huskić: je postavio dva vijećnička pitanja. Prvo je koje od mjera i aktivnosti za realizaciju preporuka, koje se odnose na poslovanje Zavoda za planiranje i izgradnju, iz Revizije Općine Kakanj iz 2020. godine, su do sada sprovedene? Podsjetio je da je u Izvještaju o finansijskoj reviziji Općine Kakanj naveden čitav niz mjera i aktivnosti koje se odnose na poslovanje Zavoda za planiranje i izgradnju Općine Kakanj, pa ga zanima koje su od mjera i preporuka implementirane, a koje nisu i zašto? Drugo pitanje je ko je vršio nadzor i tehnički prijem dvorane „Anes Begić“ u Kakanju i ko je odgovoran za propuste u gradnji projekta vrijednog 1,6 miliona maraka? Rekao je da je već u prvoj godini krov dvorane u periodima jače kiše počeo prokišnavati, pa je u salama nemoguće održavati treninge i sportske

susrete. Tako da tereni za basket, nogomet, rukomet, odbojku, deset svlačionica i fitnes/teretana, višeslojni sportski parket sa FIBA certifikatom nemaju nikakvog smisla pod krovom koji i dalje prokišnjava.

Vinka Aletović: je postavila vijećničko pitanje šta se poduzelo u vezi problematike oko saobraćaja kroz naselje Doboje? Navela je da se posebno u zimskom periodu odvijanje saobraćaja negativno odražava na stanovnike Doboja, jer su sva vozila, a posebno vangabaritna, stalna opasnost po mještane Doboja. Na ovakav način odvijanja saobraćaja kroz Doboje može se očekivati da neko nastrada i zato upozorava da se nešto po ovom pitanju odmah poduzme.

Mujo Fafulić: je postavio dva vijećnička pitanja. Prvo je da li je Služba civilne zaštite izašla na teren i utvrdila moguću opasnost za građane i objekte u kojima žive, a vezano za poziv koji je uputio dana 22.11.2023. godine, kojim prilikom je pozvao Službu civilne zaštite i zahtijevao da izađu na teren u romsko naselje Varda, obzirom da se zbog padavina pojavilo klizište ili odron? Drugo pitanje je da li JP „Grijanje“ planira proširenje mreže daljinskog grijanja u naselju Čatići?

Predsjedavajući je konstatovao da su vijećnici: Branko Češljic, Armin Bašić, Edin Šljivo, Amar Selimović, Sabit Čehajić, Mugdin Gorak, Elvir Delibašić, Enver Merdić i Slaven Katičić postavili vijećničko pitanje bez korištenja govornice.

Branko Češljic: je postavio vijećničko pitanje hoće li se do kraja godine popraviti rasvjeta u Kraljevoj Sutjesci i hoće li se nabaviti praznična rasvjeta za uže područje naselja?

Armin Bašić: je postavio vijećničko pitanje kada se konačno planira izgradnja javne rasvjete u MZ Koprivnica obzirom da se realizacija navedenog projekta čeka već nekoliko godina?

Edin Šljivo: je postavio vijećničko pitanje da li se počelo sa realizacijom projekta proširenje LED rasvjete u MZ Brnjic, ako nije kada će se početi i da li ima nekih poteškoća zbog kojih još nije počelo proširenje rasvjete?

Amar Selimović: je postavio dva vijećnička pitanja. Prvo je šta se poduzelo po prijavi građana o (ne) legalnoj gradnji na objektu firme „MSB“ (vl. Belma Delibašić) u ulici Branilaca? Drugo pitanje je da li postoji rezervisano parking mjesto (ili privatno) kod objekta firme „MSB“ (vl. Belma Delibašić) koji se nalazi u blizini bivšeg caffè Elita obzirom da navedena osoba fizički blokira više parking mjesta i na taj način dodatno pogoršava ionako mali parking prostor u tom dijelu grada?

Sabit Čehajić: je postavio vijećničko pitanje zašto u MZ Dumanac nije puštena u funkciju javna rasvjeta koja je urađena prije 3 godine? Navodi da je garancija na LED rasvjetna tijela 3 godine, a u MZ Dumanac je urađen projekat LED rasvjete prije 3 godine i isti nije pušten u funkciju do danas, zašto smatra odgovornim prethodni Savjet MZ.

Mugdin Gorak: je postavio vijećničko pitanje da li je planirana izgradnja parking prostora preko puta Srednje stručne škole s obzirom da se i zgrade nalaze uz samu cestu, a uz to je taj dio grada trenutno neuredan i po pitanju uređenosti ulice?

Elvir Delibašić: je postavio vijećničko pitanje kada se planiraju realizirati sredstva za rekonstrukciju LED rasvjete u naselju Vehabi u MZ Čatići, koja su planirana u Programu za 2021. godinu, u iznosu od 5.000 KM?

Enver Merdić: je postavio vijećničko pitanje ko je nadležan za održavanje i popravku rasvjete na mostu preko rijeke Bosne u MZ Doboje? Podsjeća da se radi o mostu koji je jako frekventan, a na istom rade samo 3 rasvjetna tijela, te je u noćnim satima lokacija problematična kako za pješake tako i za vozače.

Slaven Katičić: je postavio vijećničko pitanje da li Tvornica cementa Kakanj plaća naknadu za rekultivaciju zemljišta za kamenelom „Geben“, te ako plaća, kome naknadu plaća i koliko ja za tu namjenu uplaćeno sredstava do sada? Zamolio je da mu se podaci o eventualno plaćenju naknadi dostave tabelarno prikazani po godinama i iznosima uplata.

Vijećničke inicijative

Dževdet Huskić: je pokrenuo dvije vijećničke inicijative. Prva inicijativa je da se hitno donese Odluka o zonama sanitarne zaštite izvorišta Bukovica. Razlog za podnošenje inicijative je što je 2022. godine izvršen inspekcijski nadzor po prijavi o izvođenju nedozvoljenih aktivnosti u zoni izvorišta Bukovica. Između ostalog u Zapisniku je konstatovano sljedeće: "Napominjem da Odluka o zonama sanitarne zaštite izvorišta Bukovica Općine Kakanj nije validna, a nova odluka za koju je bio rok 5 godina tj. oktobar 2017. godine još nije donesena, te nema zakonskog osnova da se radovi mogu smatrati nezakonitim." Rekao je da u skladu s tim je očigledno da Odluka o zaštiti izvorišta vode za piće za grad Kakanj sa rijeke Bukovice – vodozahvat Bukovica nije dovoljna i da je potrebno donošenje Odluke o zonama sanitarne zaštite izvorišta Bukovica Općine Kakanj u skladu sa Pravilnikom o uslovima za određivanje zona sanitarne zaštite i zaštitnih mjera za izvorišta voda koje se koriste ili planiraju da koriste za piće. Druga inicijativa je da se OŠ „Mula Mustafa Bašeskija“ u Kaknju vrati stari naziv i da se ponovo zove OŠ „Rudi Čajavec“. Napomenuo je da je 1995. godine, OŠ „Rudi Čajavec“ promijenjen naziv i od tada se zove OŠ „Mula Mustafa Bašeskija“, a nemoguće je naći dokumente na osnovu kojih je izvršena promjena naziva škole, te je jako teško dokučiti razloge koji su doveli do toga. Smatra da je iz biografija te dvije historijske ličnosti lako zaključiti da je primjerenije da se pomenuta škola zove po kakanjskom pilotu, rođenom u Kaknju, narodnom heroju i nosiocu Spomenice 1941. i Ordena zasluga za narod prvog reda, čovjeku čiji su roditelji, brat i dvije sestre proveli život u Kaknju, nego po Mula Mustafi Bašeskiji koji je samo u kratkom periodu života 1781-1782. godine živio u Kaknju i tu obavljao mualimsku dužnost, što je lično zabilježio u svom ljetopisu.

Marcela Ravlija: je pokrenula dvije vijećničke inicijative. Prva je da se obezbijedi besplatan ultrazvučni pregled srca. Činjenica je da Dom zdravlja u Kaknju raspolaže novim UZV aparatom na kojem je olakšan detaljan pregled srca i dijagnosticiranje srčanih oboljenja, što je olakšanje za pacijente jer ne moraju čekati mjesecima na listama čekanja u KBZ-u, niti ići u privatne klinike. Međutim, i u Domu zdravlja specijalistica interne medicine te preglede obavlja van radnog vremena na novom UZV aparatu, u prostorijama našeg Doma zdravlja i takvi pregledi koštaju 50 KM, što je vrlo skupo, naročito za marginalizovane grupe ljudi kojima je ovaj pregled hitan i neophodan. U prilog inicijativi ide i činjenica da su Kakanjci jako puno izloženi utjecajima zagađenog zraka, što je jedan od glavnih uzroka kardiovaskularnih oboljenja o čemu se i govori i u izvještaju Doma zdravlja. Druga inicijativa je da se izrade novi kriteriji za subvencioniranje boravka djece u predškolskim ustanovama. U odgovoru na postavljeno pitanje „Koliko je djece, odnosno roditelja, iskoristilo pravo na subvencionirani boravak u vrtićima“ navedeno je da samo 14 roditelja trenutno koristi ovo pravo. Navela je da kakanjske vrtiće pohađa oko 300 djece, a iz činjenice da samo 14 roditelja koristi pravo na subvenciju, moglo bi se zaključiti da su skoro svi roditelji odlično finansijski situirani, da nema djece invalida ili djece bez jednog roditelja, što nažalost ne odražava stvarnu situaciju, koja je potpuno drugačija.

Namir Talić: je pokrenuo dvije vijećničke inicijative. Prva inicijativa je da se predsjednicima mjesnih zajednica na području općine Kakanj uvećaju naknade i da od 1.1.2024. godine naknada iznosi 200 KM mjesečno. Inicijativom želi ukazati javnosti na izuzetno važnu ulogu predsjednika MZ i kompleksnost njihovih poslova i zadataka. Predsjednik MZ je prvi čovjek u MZ i odgovoran je za sva dešavanja, bilo dobra ili loša, na području te MZ. U svako doba dana i noći ovi vrijedni ljudi su dostupni svojim mještanima i prva su adresa u slučaju poplava, zemljotresa, snježnih oluja i drugih nepogoda. Učesnici su svih infrastrukturnih projekata, od izrade projektne dokumentacije (koja traje mjesecima) do same realizacije projekta, te bi ih trebalo pravedno/adekvatno nagraditi. Druga inicijativa je da se osigura pravo na dodatak djeci, bez obzira na prihode, za porodice sa troje ili više djece. Podsjetio je da je Kanton Sarajevo izvršio izmjenu i dopunu Zakona o socijalnoj zaštiti, zaštiti civilnih žrtava rata i zaštiti porodice s djecom tako da je propisano: „Pravo na dodatak djeci bez obzira na prihode pripada porodici koja ima troje ili više djece.“ S toga predlaže da Skupština Zeničko-dobojskog kantona i Ministarstvu za rad, socijalnu politiku i izbjeglice ZDK razmotre mogućnost usvajanja izmjena Zakona u skladu sa gore navedenim. Smatra da bi se ovim rješenjem podstakao natalitet kao i kvalitet života porodica što bi ublažilo i odlaske porodica u inostranstvo.

Vinka Aletović: je pokrenula vijećničku inicijativu da se formira radno tijelo (komisija) za iznalaženja modaliteta osnivanja Općinskog fonda solidarnosti za sufinansiranje troškova liječenja najtežih oboljenja naših sugrađana, prvenstveno djece. Zbog činjenice da je sve više sugrađana koji vode mukotrpnu borbu za život uslijed najtežih oboljenja, predlaže formiranje komisije iz sastava općinske uprave

(Općinsko vijeće i službe) i Zdravstvenog savjeta Općine Kakanj u cilju iznalaženja modaliteta osnivanja Općinskog fonda solidarnosti. Smatra da u predmetnu aktivnost treba uključiti sva pravna i fizička lica kako bi se novčana sredstava akumulirala i služila u svrhu liječenja i spašavanja života naših sugrađana.

Sabit Čehajić: je pokrenuo dvije vijećničke inicijative. Prva inicijativa je da se izgrade trotoari na dionici puta ulice 9. maj i dalje u ulici Mehmedalije Sikire do Novog naselja Bare, a zbog velikog broja učenika koji idu u školu sa područja Plandišta. Razlog za inicijativu je činjenica da na području naselja Plandište i Novog naselja Bare ima oko 250 učenika osnovne i srednjih škola i njihova sigurnost je vrlo ugrožena znajući da je frekvencija saobraćaja velika, a naročito je otežano kretanje u dijelu od Plandišta prema Novom naselju Bare, ulicom Mehmedalije Sikire. Druga inicijativa je da se pristupi iznalaženju lokacije za izgradnju nove ambulante porodične medicine „Stara jama“. Zbog činjenice da je obavljena javna licitacija za prodaju imovine (zemljišta i objekata pogona „Stara jama“) koju je provela Porezna uprava F BiH, te će vrlo brzo doći do prodaje iste, inicijativu smatra opravdanom jer na toj lokaciji je smještena ambulanta porodične medicine koja pruža usluge za preko 4000 pacijenata.

Mediha Mamela: je u ime Kluba vijećnika SDA pokrenula vijećničku inicijativu da Komisija za Etički kodeks u skladu sa svojom nadležnosti ispita odgovornost vijećnika i izabranog zvaničnika Branka Češljica za povredu odredaba Etičkog kodeksa za izabrane zvaničnike Općine Kakanj. Napomenula je da je vijećnik iz političkog subjekta Naša stanka Branko Češljic, dana 30.10.2023. godine, na svom zvaničnom profilu na društvenoj mreži Facebook objavio tekst koji u sebi ima elemente govora mržnje, a kojim vrijeđa i omalovažava svoje kolegice i kolege, vijećnike iz Općinskog vijeća Kakanj, što je u suprotnosti sa odredbama Etičkog kodeksa za izabrane zvaničnike Općine Kakanj. Naime, isti je objavio tekst: „Sutra ujutru sjedica Opštinskog vijeća. Valja bit u jednoj prostoriji s predstavnicima savremene zelene endehazije... Smrt fašizmu drugovi i drugarice! I rudarsko Sretno!“. Smatra da je navedenim tekstom Češljic duboko uvrijedio i uznemirio vijećnice i vijećnike u Općinskom vijeću Kakanj, prije svega jer je takav vid komunikacije nedopustiv, nedozvoljen, ničim izazvan i provokativan, a uz to se još uvreda odnosi i na vijećnice koje su izabrane voljom građana općine Kakanj, koje su kćerke, sestre, supruge, uvažene članice društva. Navela je da nije jasno zašto je Češljic svoje kolegice i kolege vezao za jednu fašističku politiku kakva je bila NDH i misli da je to prvi put u historiji Općinskog vijeća Kakanj da je korišten takav rječnik mržnje. Shodno navedenom, očekuje od Komisije za Etički kodeks da u skladu sa svojim nadležnostima ispita i utvrdi sve navode, te u skladu sa propisima donese odluku i izrekne odgovarajuću mjeru.

Armin Bašić: je pokrenuo vijećničku inicijativu da se propisno sanira sistem odvodnje oborinskih voda pored OŠ „15. april“. Ovo iz razloga što se u vrijeme padavina javlja začepljenje kanala čiji promjer nije dovoljan da primi svu vodu i suspendovani materijal koji se izljevaju na cestu i kreću sve do željezničke stanice otežavajući kretanje pješaka i vozila. Također, na mjestu izljevanja nastaju i ogromne količine leda što izaziva opasnost po učesnika u saobraćaju, a posebno djecu, jer se to nalazi u neposrednoj blizini škole, te se uz to stvaraju ogromni problemi svim vlasnicima objekata na prostoru od OŠ „15. april“ do podvožnjaka na željezničkoj stanici.

Slaven Katičić: je pokrenuo vijećničku inicijativu da se u Budžetu Općine Kakanj za 2024. godinu osiguraju finansijska sredstva za plaćanje tekućih troškova električne energije i vode za potrebe društvenih domova u mjesnim zajednicama općine Kakanj. Rekao je da na prostoru općine Kakanj, pogotovo u seoskim naseljima, ima određen broj domova koji se koriste za potrebe funkcionisanja savjeta mjesnih zajednica i ostale potrebe lokalne zajednice, s tim da je nedefinisan način njihovog održavanja i plaćanja komunalija. Kako je već definisano da predsjednici savjeta imaju određenu naknadu, smatra da bi potrebno bilo definisati i ovaj vid podrške radu mjesnih zajednica.

Predsjedavajući je konstatovao da su vijećnici: Adis Mrkonjić, Kenan Kozlo, Elvir Delibašić, Mugdin Gorak i Amar Selimović podnijeli vijećničke inicijative bez korištenja govornice.

Adis Mrkonjić: je pokrenuo vijećničku inicijativu da se postavi saobraćajno ogledalo na raskrsnici kod džamije u Donjem Kakanju. Smatra da je navedena raskrsnica opasna za učesnike u saobraćaju obzirom da nema potpune preglednosti iz oba smjera za vozila koja se kreću pravcem Kakanj – Brnjic i Kakanj – Mramor.

Kenan Kozlo: je pokrenuo vijećničku inicijativu da se pokrenu aktivnosti koje će osigurati pravo prednosti bez čekanja u redu za osobe sa težim invaliditetom, roditelje djece sa poteškoćama u razvoju, trudnice i majke sa malom djecom u prostorijama Općine i po mogućnosti u drugim javnim ustanovama.

Elvir Delibašić: je pokrenuo vijećničku inicijativu da svi sportski klubovi, koji apliciraju na sredstva Općine Kakanj, ne naplaćuju članarinu za djecu do 18 godina. Smatra da Općina Kakanj ulaže velika sredstva po raznim osnovama za razvoj sporta u gradu, a cijeneći da su nam djeca prioritet, te da iz kvantiteta proizilazi kvalitet, više bi se djece uključilo u sportske aktivnosti, obzirom na trenutnu ekonomsku situaciju roditelja.

Mugdin Gorak: je pokrenuo vijećničku inicijativu da se u ulici ZPO broj 112 prelaz preko ceste koji vodi ka Domu zdravlja Kakanj i vrtiću „Pčelica i med“, ocrta pješački prelaz i stavi saobraćajni znak pješačkog prelaza zbog velike frekvencije pješaka, posebno djece i automobila.

Amar Selimović: je pokrenuo vijećničku inicijativu da se pokrenu aktivnosti za izradu projekta poboljšanja sigurnosti djece koja koriste usluge JU „Mladost“, obzirom da su djeca najranjiviji dio našeg društva i da njihova sigurnost mora biti na prvom mjestu. U tom smislu predlaže postavljanjem kapije/ograde, angažman zaštitara, postavljanje sigurnosnih kamera ili bilo kojeg drugog vida zaštite što bi bilo definisano odgovarajućim sigurnosnim projektom.

Utvrđivanje dnevnog reda

Predsjedavajući je za 34. redovnu sjednicu predložio dnevni red koji je usaglašen na sjednici Kolegija i predložio da se u dnevni red uvrsti naknadno pristigli materijal „Izveštaj o radu Komisije za provođenje javnog nadmetanja-licitacije pri prodaji poslovnih prostora u vlasništvu Općine Kakanj s prijedlogom zaključka o utvrđivanju visine naknade za rad Komisije“ (tačka 9. dnevnog reda), te je rekao da je predlagač povukao sa dnevnog reda tačku „Prijedlog odluke o utvrđivanju javnog interesa u svrhu proširenja rudarskih radova u „Istočnom reviru“ pogona „Vrtlište“, lokalitet Stupe“ (tačka 7. dnevnog reda).

U diskusiji po dnevnom redu je učestvovala Vinka Aletović.

Vinka Aletović: je kazala da su vijećnici u materijalima dobili Odluku o utvrđivanju javnog interesa u svrhu proširenja rudarskih radova na pogonu Vrtlište-lokalitet Stupe po prijedlogu RMU Kakanj, kao i elaborat za predmetne radove, te smatra da su ispunjeni svi uslovi za diskusiju po toj tački dnevnog reda, odnosno nije joj jasno zašto se ista povlači sa dnevnog reda.

Predsjedavajući je napomenuo vijećnike da prema Poslovniku predlagač ima pravo da puvuče tačku sa dnevnog reda prije otvaranja diskusije i utvrđivanja dnevnog reda, bez objašnjenja i obrazlaganja.

Mukades Delibašić (odgovor): je u ime predlagača pojasnio da u materijalima nije dostavljena skica o udaljenosti objekata od parcela koje se planiraju ekspropisati, a iz razloga što se na jednom objektu nalazi mjerno mjesto koje mjeri uticaj miniranja na objekte. Rekao je da će naknadno vijećnicima biti dostavljena kopija katastraskog plana kako bi se moglo vidjeti kolika je udaljenost objekata od zone radova.

Vinka Aletović: je istakla da je skica trebala da bude u već dostavljenim materijalima, ako istu treba uopće dostavljati, te tako smatra da objašnjenje nije uredu.

Nakon diskusije predloženi dnevni red je usvojen sa 19 glasova ZA, 5 glasova PROTIV i 2 glasa UZDRŽAN.

Usvojeni dnevni red

1. Nacrt budžeta Općine Kakanj za 2024. godinu
2. Nacrt odluke o izvršavanju budžeta Općine Kakanj za 2024. godinu
3. Razmatranje Izvještaja o izvršenju Budžeta Općine Kakanj za period 01.01-30.09.2023. godine

4. Prijedlog odluke o izmjenama Odluke o utvrđivanju registra naziva ulica, trgova i mostova na području općine Kakanj
5. Prijedlog odluke o izmjenama i dopunama Odluke o novom nazivu ulice u Čatićima
6. Prijedlog odluke o izmjenama i dopunama Odluke o organizovanju Javne ustanove za predškolski odgoj i obrazovanje „Mladost“ Kakanj
7. Prijedlog odluke o utvrđivanju javnog interesa u svrhu izgradnje zapadne kosine sa izmještanjem lokalnog puta za Slapnu Goru, obuhvat za područje deponije šljake i pepela za potrebe podružnice Termoelektrana „Kakanj“ Kakanj
8. Prijedlog odluke o davanju na privremeno korištenje prostorija Vatrogasnog doma Kraljeva Sutjeska Udruženju žena općine Kakanj „UŽOK“
9. Razmatranje Izvještaja o radu Komisije za provođenje javnog nadmetanja – licitacije pri prodaji poslovnih prostora u vlasništvu Općine Kakanj s prijedlogom zaključka o utvrđivanju visine naknade za rad Komisije
10. Prijedlog rješenja o utvrđivanju prava vlasništva u korist Nihade Skeleđija iz Kakanja

Vijeće je vodilo objedinjenu raspravu po tačkama 1. i 2. dnevnog reda, a glasanje je obavljeno pojedinačno.

1. Nacrt budžeta Općine Kakanj za 2024. godinu

2. Nacrt odluke o izvršavanju budžeta Općine Kakanj za 2024. godinu

Predlagač: Općinski načelnik

Obrađivač: Služba za finansije

Izjavitelj: Džihad Berbić, pomoćnik općinskog načelnik

U diskusiji je učestvovao Dževdet Huskić.

Dževdet Huskić: je kazao da će Klub NS podržati Nacrt budžeta. Tražio je pojašnjenje koji je izvor sredstava za kapitalni transfer Zavodu (utrošak sredstava od prodaje poslovnih prostora, stanova i zemljišta za projekte). Konstatovao je da nije razmatrano uvrštavanje Zavoda u budžet kao stavke, a što je jedna od preporuka iz Nalaza finansijske revizije Općine. Još je ustvrdio da programi nisu sastavni dio budžeta čime se značajno smanjuje mogućnost vijećnicima da aktivno učestvuju u kreiranju istih, što ne bi bio slučaj da se nalaze u okviru budžeta. Na kraju je rekao da smatra da rok od 15 dana za javnu raspravu je kratak rok za donošenje najznačajnijeg dokumenta za lokalnu zajednicu, kao i da bi trebalo održati barem 3-4 javne rasprave izvan općinske zgrade i to u pojedinim MZ, po mogućnosti iza radnog vremena, kako bi istima mogao prisustvovati što veći broj građana.

Džihad Berbić (odgovor): je pojasnio da prihod od prodaje stanova koji vrši Zavod PIO, zatim prihod od prodaje objekata i opreme, te prihod od prodaje zemljišta su prihodi koji će biti opredjeljeni za transfer prema Zavodu, što je bila nejasnoća za vijećnika Huskića. Još je podcrtao da je u posljednjim godinama evidentna stagnacija prihoda svih JU, a istovremeno su rashodi u stalnom porastu.

Nakon diskusije Vijeće je jednoglasno sa 26 glasova ZA usvojilo Zaključak o utvrđivanju Nacrta budžeta Općine Kakanj za 2024. godinu, te Zaključak o utvrđivanju Nacrta odluke o izvršavanju budžeta Općine Kakanj za 2024. godinu, jednoglasno sa 26 glasova ZA, sve sa javnom raspravom u trajanju od 15 dana u periodu 01.12-15.12.2023. godine.

3. Razmatranje Izvještaja o izvršenju Budžeta Općine Kakanj za period 01.01-30.09.2023. godine

Predlagač: Općinski načelnik

Obrađivač: Služba za finansije

Izjavitelj: Džihad Berbić, pomoćnik općinskog načelnik

U diskusiji nije niko učestvovao i Vijeće je usvojilo Izvještaj o izvršenju Budžeta Općine Kakanj za period 01.01-30.09.2023. godine, sa 17 glasova ZA, bez glasova PROTIV i 5 glasova UZDRŽAN.

Vijeće je vodilo objedinjenu raspravu po tačkama 4. i 5. dnevnog reda, a glasanje je obavljeno pojedinačno.

4. Prijedlog odluke o izmjenama Odluke o utvrđivanju registra naziva ulica, trgova i mostova na području općine Kakanj

5. Prijedlog odluke o izmjenama i dopunama Odluke o novom nazivu ulice u Čatićima

Predlagač: Općinski načelnik

Obrađivač: Komisija za utvrđivanje kriterija, postupka, načina davanja i izmjene naziva ulica, trgova...

Izjavitelj: Sedin Karahodžić, predsjednik Komisije

U diskusiji nije niko učestvovao i Vijeće je usvojilo Odluku o izmjenama Odluke o utvrđivanju registra naziva ulica, trgova i mostova na području općine Kakanj, sa 22 glasa ZA, bez glasova PROTIV i 2 glasa UZDRŽAN, te je usvojilo Odluku o izmjenama i dopunama Odluke o novom nazivu ulice u Čatićima, sa 23 glasa ZA, bez glasova PROTIV i 2 glasa UZDRŽAN.

6. Prijedlog odluke o izmjenama i dopunama Odluke o organizovanju Javne ustanove za predškolski odgoj i obrazovanje „Mladost“ Kakanj

Predlagač: UO JU za predškolski odgoj i obrazovanje „Mladost“ Kakanj

Obrađivač: UO JU za predškolski odgoj i obrazovanje „Mladost“ Kakanj

Izjavitelj: Azra Čišija, direktorica JU i Mirsada Čaluk, predsjednica UO JU „Mladost“ Kakanj

U diskusiji je učestvovao Dževdet Huskić.

Dževdet Huskić: je rekao da mu je jasan prvi dio predmetne odluke jer se u tom dijelu radi o usklađivanju adresnih podataka, ali mu je nejasan dio gdje se brišu odredbe koje propisuju da osnivač (Općinsko vijeće) daje saglasnost na Pravila JU, odnosno nije mu jasno sa čime se te odredbe usklađuju, kako je navedeno u obrazloženju odluke. Kazao je da predmetno problematizira iz razloga što u Uredbi o ustanovama stoji da Pravila JU donosi Upravni odbor, a isti odgovara osnivaču za rezultate rada. Smatra da ne bi trebalo dovoditi u koliziju pojedine odredbe Uredbe i onemogućiti predstavnicima javnosti tj. Općinskom vijeću da barem diskutuju o pravilima svih JU. Na kraju je rekao da ne vidi razlog zašto se ta odredba briše, te je pozvao predlagača da Odluku u tom dijelu koriguje.

Nakon diskusije Vijeće je usvojilo Odluku o izmjenama i dopunama Odluke o organizovanju Javne ustanove za predškolski odgoj i obrazovanje „Mladost“ Kakanj, sa 18 glasova ZA, 2 glasa PROTIV i 4 glasa UZDRŽAN.

7. Prijedlog odluke o utvrđivanju javnog interesa u svrhu izgradnje zapadne kosine sa izmještanjem lokalnog puta za Slapnu Goru, obuhvat za područje deponije šljake i pepela za potrebe podružnice Termoelektrana „Kakanj“ Kakanj

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izjavitelj: Mukades Delibašić, pomoćnik općinskog načelnika

U diskusiji nije niko učestvovao i Vijeće je usvojilo Odluku o utvrđivanju javnog interesa u svrhu izgradnje zapadne kosine sa izmještanjem lokalnog puta za Slapnu Goru, obuhvat za područje deponije šljake i pepela za potrebe podružnice Termoelektrana „Kakanj“ Kakanj, sa 23 glasa ZA, bez glasova PROTIV i 1 glas UZDRŽAN.

8. Prijedlog odluke o davanju na privremeno korištenje prostorija Vatrogasnog doma Kraljeva Sutjeska Udruženju žena općine Kakanj „UŽOK“

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izjavitelj: Mukades Delibašić, pomoćnik općinskog načelnika

U diskusiji nije niko učestvovao i Vijeće je jednoglasno sa 25 glasova ZA usvojilo Odluku o davanju na privremeno korištenje prostorija Vatrogasnog doma Kraljeva Sutjeska Udruženju žena općine Kakanj „UŽOK“.

9. Razmatranje Izvještaja o radu Komisije za provođenje javnog nadmetanja – licitacije pri prodaji poslovnih prostora u vlasništvu Općine Kakanj s prijedlogom zaključka o utvrđivanju visine naknade za rad Komisije

Predlagač: Komisija za za provođenje javnog nadmetanja-licitacije

Obrađivač: Služba za imovinskopravne, geodetske poslove i katastar nekretnina

Izjetilac: Armin Bašić, predsjednik Komisije

U diskusiji nije niko učestvovao i Vijeće je jednoglasno sa 25 glasova ZA usvojilo Zaključak o prihvatanju Izvještaja o radu Komisije za provođenje javnog nadmetanja – licitacije pri prodaji poslovnih prostora u vlasništvu Općine Kakanj i utvrđivanju visine naknade članovima Komisije.

10. Prijedlog rješenja o utvrđivanju prava vlasništva u korist Nihade Skeleđija iz Kaknja

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izjetilac: Mukades Delibašić, pomoćnik općinskog načelnika

U diskusiji nije niko učestvovao i Vijeće je jednoglasno sa 25 glasova ZA usvojilo Rješenje o utvrđivanju prava vlasništva u korist Nihade Skeleđija iz Kaknja.

Predsjedavajući je zaključio rad 34. redovne sjednice Općinskog vijeća u 10:40 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**

-po ovlaštenju-
Emir Zaimović

**PREDSJEDAVAJUĆI
OPĆINSKOG VIJEĆA**

Slaven Katičić